

الفصل التاسع

"إخلاء سبيل"

في صباح اليوم التالي، في مكتب اللواء:

- يعني الولد اعترف على نفسه وبراً البنت؟
- بالظبط يا فندم.
- أنا شايف يا سيادة الرائد إنك ناوي على إطلاق سراحها.
- وجودها هنا مالوش داعي يا فندم.
- إيه الي مخلّيك متأكد كده إنه مش بيداري عليها؟ أو إنه عايزها تخرج
- تساعد كارولين من تاني؟
- لأني متأكد يا فندم إن ولا هي ولا هو ليهم علاقة بالقضية، ولا من قريب ولا من بعيد سعادتك.
- ازّاي؟! انتَ مش بتقول إنه اعترف؟
- اعترف يا فندم بس مش باللي عمله، باللي حفظ إنه يقوله.
- انتَ تقصد إنه مجرد طعم تاني لتعطيل سير القضية وتعقيدها.
- بالظبط سيادتك، كل حاجة بتقول إنه مش هو الي استقبل كارولين
- ولا عمره شافها حتّى.
- أطال اللواء في النظر إليه متسائلاً منتظراً منه تفسيراً؛ فاستطرد هشام:

- أولاً يا فندم الشخص الي شوفناه في الفيديو كان هيئة جسمه وحجمه أكبر من أحمد، ثانياً لو كان هو المتهم بجد ماكانش هيروح شقة المنييل تاني بعد محاولة القبض عليه؛ لأنه هيكون عنده شك إنها متراقبة، تالت حاجة يافندم إني واثق من إن كارولين عمرها ما راحت شقة المنييل، وإن الشقة دى كان مستخبي فيها العنصر المجهول، أو بمعنى أدق تليفونه، المكالمة الوحيدة الحقيقية الي صدرت للرقم ده كانت من الفندق، ولما عرفوا إننا كشفناهم سجلوا مكالمات وهمية وسابوا التليفون في الشقة دي، واللي هي بالمناسبة ولا متأجرة ولا متباعة، أصحابها هجروها من ١٠ سنين وعاشين حالياً في فيلا في الشيخ زايد، والعنصر المجهول استغلّ ده كويس.

- امم، تحليل منطقي، أفهم من كده إن شكك الأولاني لسه قائم؟
- وأكثر من الأول يا فندم.

رد اللواء بروح فكاهية:

- طب يا أخي افصحلي عنه يمكن أقدر أساعدك.
- ابتسم هشام قائلاً:
- حضرتك علمتنا ما نرميش التّهم جزافاً بدون دليل، وطول ما أنا مش معايا الدليل مش هقدر أتّهم الشخص ده، وخاصة...
- اللواء: وخاصة إنك شاكك في خاين من الجهاز، مش كده؟
- اندهش هشام لذكاء اللواء قائلاً:
- ده معناه إن حضرتك عندك نفس الشك!

- إلى حد ما، بس حابب أعرف أسبابك للشك ده.
- شكّي بدأ من ساعة ما كارولين عرفت بوجود المخبر الي بيراقبها وهربت منه بالشكل ده، مع إنها داخلة مصر بشخصية جديدة ماعليهاش أي حاجة، والمفروض تكون متأكدة إنها مش مشكوك فيه، بعدها شكّي اتأكد لما عرفت بقرص التتبع الي اتخيّط داخل هدموها، ازاي قدرت تكتشفه؟ تالت حاجة بقى ودي الأهم ازاي عرفت إن الرقم الي كلمته من الفندق بقى متراقب؟ وبناءً على كده سجّلوا مكالمات مزيفة كان مقصود بيها تضليلنا، محدش ممكن يمدّها بكل المعلومات دي غير واحد منّا، وبالتحديد من الي شغالين على القضية.

نهض اللواء عن مكتبه يحكّ ذقنه بأصبعيه يفكر في الأمر، ثم قال:

- بس ده كلام خطير يا سيادة الرائد، لازم تاخذ بالك كويس قبل ما تتهم أيّ حد، وإلا العواقب هتكون وخيمة.
- أوما هشام بإدراك: مفهوم يا فندم ... مفهوم.
- طب والبت دي لو هتفرج عنها لازم تبقى عارف إن حياتها هتكون في خطر، وأظن إني من البداية لفتّ نظرك للنقطة دي.
- اطمّن سيادتك يا فندم، أنا أكيد عامل حسابي وهيكون عليها مراقبة مشددة.

- ممتاز، تقدر تتفضّل وتوافيني بالتقارير أول بأول.

- أكيد يا فندم، بعد إذن سيادتك.

في مكان آخر صحراوي تمتلئ التلال على جانبيه في شموخ، أخذت جنة تركض وحيدة تبحث عن شبح إنسان يساعدها في ذلك المكان المقفر، لكن دون جدوى، واصلت ركضها بين المرتفعات حتى وصلت آخر الطريق؛ لتجد نفسها أعلى جبل على شفا هوة على ارتفاع بعيد مرعب، والأكثر فزعاً هي تلك النيران المشتعلة بالأسفل، حاولت جنة التراجع، لكن كان هناك رياح خفية تزجّ بها، تدفعها بقوة وقسوة، صرخت بأعلى صوتها، بينما كان نصف جسدها مائلاً إلى السقوط وقد استسلم جسدها للجاذبية من أسفلها وأعلن قلبها الخضوع، وفي لحظة يأسها فوجئت بذراعها تجذب ثانية إلى المرتفع وقد تشابك بيدها يدٌ أخرى أكثر قوة، استعاد قلبها خفقه السريع وهي تعاود الحياة ثانية بارتفاع نصف جسدها العلويّ مرة أخرى محاولة رؤية منقذها من تلك الرؤية الضبابية المعبّقة بالرياح والرمال، حتى ظهرت لها ملامحه، أسود العينين حليق اللحية، كثيف الشعر قاسي البنية، عرفته على فورها تحدّق به بعينين فاغرتين دهشة، ومن ثمّ شهقت مستعيدة وعيها المفقود ليلة كاملة؛ لتجد نفسها بغرفة بيضاء لم تعرفها من قبل، وحوّلها أسرتها؛ أبوها وأُمها.

انفضت جالسة وهرعت إليها والدتها تحتضنها بلهفة:

- بنتي.. بنتي حببتي، حمداً لله على سلامتك يا قلبي.

بينما ما زالت جنّة في حالة من التيه والضياع تجاهد لاستيعاب ما يحدث حولها متذكّرة أحداث اليومين السابقين، ثم هتفت بصوت ضعيف تستشعر الأمان من عناق والدتها:

- ماما! إيه الي حصل؟ وانتوا عرفتوا مكاني ازاي؟
- ربت والدها على رأسها مقبلاً جبهتها هاتفاً:
- حمداً لله على سلامتك يا حوريتي.
- ابتسمت بوهن وقالت:
- الله يسلّمك يا حبيبي.. ما قولتوليش برضه عرفتوا مكاني ازاي؟ وإيه الي جابني هنا؟ احنا في مستشفى، صح؟
- كاد والدها يرد، لكن منعه صوت طرق على الباب فنهض، فتحه، وما لبث أن تجهم وجهه؛ فسمعت جنة صوتاً ألفتة في هذين اليومين:
- صباح الخير يا باشمهندس طارق، إيه هتسيبنى واقف ع الباب؟
- أشار له طارق بالدخول على مضض قائلاً:
- اتفضل يا حضرة الطابط.
- كان لدخول هشام أثرٌ مفزعٌ في قلب جنة، تُرى هل أتى ليعيدها إلى ذلك السجن المقيت أم غرفة التحقيق البغيضة؟! تعلقت أنظارها الفزعة به منتظرة انطلاق لسانه المعتاد لتعرف سبب مجيئه؛ فسمعته يقول موجهًا حديثه إليها:
- ألف سلامة يا أنسة جنة.

أشاحت بناظرها بعيداً، ولم ترد؛ فتدخّل والدها قائلاً بضيق:

- الله يسلمك يا سيادة الرائد، ويكون بمعلومك بنتي هترجع معنا على بيتها، انت جيتلي امبارح وطمّنتنا عليه مشكوراً ووعدتنا إنكوا مش هتمسّوا شعرة منها، وإنك واثق في برائتها، وقولتلنا مفيش داعي للمحامي، و..

هشام مقاطعاً: وأنا عند وعدى يا باشمهندس.

كانت جنة ترقب الوضع بدهشة كبيرة، هل كان والدها يعرفان مكانها؟ أذهب إلى بيتها ليطمئنّها عليها.. بل ويثق في براءتها أيضاً؟!

رد والدها بانزعاج:

- ما هو واضح بدليل إن بنتي في المستشفى من امبارح بانهيّار عصبي.

أوشك هشام أن يرد، لكن بادرتة جنة قائلة:

- بابا، حضرة الطباط مالوش ذنب، بالعكس كان بيعاملني كويس جداً، أنا بس الي كنت مخضوضة شوية من الموقف.

حدجها هشام بنظرة غير مفهومة، ثم قال:

- ومع ذلك بعذر لحضرتك يا باشمهندس طارق، وزى ما وعدت حضرتك جنة.. أقصد الآنسة جنة هتخرج النهاردة وتمارس حياتها بشكل طبيعي جداً، كل الي عليها بس إننا وقت ما نحتاجها نلاقيها.

جنة باضطراب:

- يعني إيه؟! أنا لسه مشتبه فيّ؟

مطّ هشام فمه قائلاً:

- أنسة جنة، القضية كبيرة وكل شوية بيظهر فيها تطورات، أنا عارف إنكوا مش هتستوعبوا ده بس دي إجراءات وقوانين، كل اللي أقدر أقوله إني واثق من براءتك، ولحد ما أمسك المجرم الحقيقي ممكن يكون فيه خطر عليكي، والـ... برجو إن وقت مانحتاجك نلاقيكي عشان ماتزيدش الشبهات حواليك، لكن بشكل رسمي انت مش عليكي أي حاجة، وتقدر ترجعي جامعتك بدون أي مشاكل، ومع ذلك يُفضّل ترتاحي في البيت اليومين دول.. ده أأمن ليكي.

زمت فمها بسخط، وأطرقت برأسها الناحية الأخرى، بينما ظل نظره مثبتاً عليها، ونادى العسكري من الخارج؛ فدلف إليه ومعه دفتر أعطاه لجنة لكي توقع به؛ ففعلت، حينذاك وصل مسامعهم صوت شاب مرح:

- ها؟ فاقت ولا لسه بتدلّع؟

ارتسمت البسمة على محياها، ما إن أبصرت أحمد ابن خالتها وأخاها الروحي، لاحظ هشام ابتسامتها؛ فالتفت بحاجب مرتفع إلى صاحب الصوت، والذي اتجه إليها مباشرة، وجلس قبالتها على فراشها مبتهجاً وأمسك يديها يشد عليها قائلاً:

- إيه بقى يا ست چيني؟ مش كفاية دلّع بقى ونطلع من هنا! انت عارفة أنا مابطيقش جو المستشفيات ده.

رمقه هشام بنظرة جامدة يفكر في نفسه "ويطلع مين حيلتها ده؟ التقارير بتقول إنها وحيدة أبوها وأمها، ومش مخطوبة كمان، أو مال مين ده؟!". قطع تساؤلاته صوت طارق قائلاً:

- من بعد إذنك يا سيادة الرائد ممكن كلمتين برّه؟

رد هشام وما زال نظره مثبتاً على جنة وأحمد:

- آه طبعاً، اتفضل!

خرج هشام مع طارق، واستقرّا أمام الغرفة، حيث ابتدر هشام متسائلاً:

- خير يا باشمهندس؟

طارق بقلق:

- أرجوك يا سيادة الرائد تقولي الحقيقة، بنتي فيه خطر عليها؟ يعني

هي ممكن تبقى متهمة بقضية زي دي؟

هشام بلامح هادئة: ما تقلقش يا باشمهندس، كل حاجة هتبقى تمام وبتتك مش هيمسّها أي ضرر.

طارق: طب لو سمحت أنا كلمت محامي صديقي، أرجوك تطلّعه على القضية وموقف بنتي منها.

هشام: صدقني حضرتك مفيش داعي لكل ده، ولو احتاجناها تاني في أي استجواب ممكن نسمح لوجود المحامي، ثِق فَيّا.

هز طارق رأسه باطمئنان يشوبه بعض القلق، واستأذن منه هشام مغادراً المشفى.

في الغرفة:

رن هاتف أحمد؛ فهمهم قائلاً:

- ده الاتصال العشرين يا مالك، صبرني يا رب.
- أيوه يا عم مالك؟
- مابتدش على طول ليه يا ابني انت؟
- ماسمعتوش يا عم، كنت بخلص أوراق المستشفى.
- طب ها؟ جنة عاملة إيه دلوقتي؟ فاقت ولا لسه؟
- فاقت يا عم وزيّ القردة أهيه.
- قرد لما ينططك يا بعيد، طيب سلّمي عليها، وأنا هخلص شغل وأجيلكوا على طول.
- على طول ولا عرض؟
- تيت تيت تيت
- يا ابن ال....
- ضحكت جنة قائلة: مستني منه إيه بعد القلشة الرخيصة دي؟! أحمد متصنعاً التبرّم:
- حتى انت! لعلمك أنا عملت كده بس عشان أضحكك.
- ربتت جنة على ذراعه قائلة بامتنان:
- ربنا يخليك ليّا.

استقلَّ هشام سيارته جالسًا خلف المقود، يتسلَّل إلى قلبه شعور بالحنق والضيق لا يدرك مغزاه، ألقى نظرة أخيرة نحو المشفى، ثم انطلق بسيارته بعيدًا مخلِّفًا عنه سحابة من السخط والانزعاج غير المبرر.

في منزل طارق كانت سلوى خالة جنة وزوجة ابنها سارة في انتظارهم يعدّان الطعام والشراب لاستقبالهم، وما إن فرغت من أعمالهما حتى سمعتا صوت الباب يُفتح، ودلف منه طارق متمثِّمًا:

- تعالي يا حبيبتى، نورتي بيتك.

هرعت إليها سارة بقلق، ودّها لو تطمئنَّ عليها ليرتاح قلبها؛ فهي صديقة طفولتها وأعز الأقربين إليها، احتضنتها بلهفة، ثم ابتعدت عنها قليلًا وأمسكت بكفيها هاتفة:

- جنة، حبيبتى انتِ كويسة؟

تألّمت جنة؛ فقد كانت سارة تضغط على مكان الكانويلا بيدها؛ فرفعت سارة يدها معتذرة، بينما ردّت جنة ببسمة واهنة:

- أنا بخير يا سارة ماتقلقيش.

جاءهم صوت خالتها بعدما حمّمت حرجًا من ظنونها السابقة:

- حبيبتى، حمداً لله على سلامتك.

جنة: الله يسلمك يا خالتو.

سلوى: إيه! هتفضلوا واقفين ع الباب كده؟! ادخلوا كمّلوا سلامات جوّه، الأكل هيبرد، عملتلك بقى يا حبيبتى الحمام المحشي بالفريك زي ما بتحببيه، عشان تتغذّي كده وتحفّي بسرعة.

جنة: تعبتي نفسك يا خالتو، ماكانش له لزوم كل ده.

سلوى: ازاي بقى؟ احنا عندنا كام جنة!

منال: ربنا يخليكي لينا يا سلوى.

تدخل أحمد بمرحه المعتاد: طب إيه؟ أنا واقع من الجوع، لو هتفضلوا تتكلّموا كده فأنا مضطر...

سلوى بلهجة تهديد: مضطر إيه يا ابن سلوى؟!

أحمد: مضطرّ أستنى يعني هعمل إيه؟

سلوى: آه بحسب.

تمتم بسرّه: ده أنا ابنك على فكرة، أومال لو كنت ابن ضرتك!

لاحظته جنة؛ فقالت مشاكسة:

- بتقول حاجة يا أحمد؟

حمحم قائلاً:

- احم، بقول هو.. أومال مالك اتأخر ليه؟

لم تستطع جنة كبت ضحكاتها، بينما ضيقّ أحمد عينيه متوعداً إياها معيداً إلى روحها القليل من البهجة التى فقدتها في اليومين السابقين.